



Pou Piblikasyon Imedya: 02/01/2024

GOUVÈNÈ KATHY HOCHUL

GOUVÈNÈ HOCHUL PREZANTE PREMYE PWOPPOZISYON DISKOU ETA LETA 2024 LA: AJANDA PWOTEKSYON KONSOMATÈ & ABÒDABILITE A

Premye ekspansyon Lwa Pwoteksyon Konsomatè New York la nan plis pase 40 ane ak mezi pou asire ekite nan sèvis "Achte Kounye a, Peye Pita"

Premye gwo ogmantasyon nan avantaj pou konje medikal ak andikap peye depi 1989; lye avantaj yo ak salè mwayèn chak semèn nan tout Eta a

Plan k ap mennen nan nasyon an pou elimine ko-peman asirans pou ensilin, sa k ap fè Nouyòkè yo ekonomize 14 milyon dola an 2025 sèlman

Aksyon solid pou pwoteje Nouyòkè yo kont dèt medikal, limite kapasite lopital yo pou pouswiv pasyan ki gen revni ba yo devan lajistis, ak ogmante pwogram asistans finansye yo

Ogmantasyon salè minimòm Gouvènè Hochul te garanti nan Bidjè Ane Fiskal 2024 la te anvigè nan jou Nouvèl Ane a

Gouvènè Kathy Hochul te devwale jodi a yon gwo pwogram pwoteksyon konsomatè ak abòdabilite, premye eleman nan kad diskou sou Sitiyasyon Eta 2024 li a. Gouvènè Hochul te anonse pwopozisyon pou amande Lwa Konsomatè New York yo pou ranfòse pwoteksyon konsomatè kont pratik biznis enjis yo; etabli règleman ki se lidè nan nasyon an pou endistri prè Achte Kounye a, Peye Pita (Buy Now Pay Later); avanse premye gwo ogmantasyon nan avantaj konje medikal peye nan plis pase twa deseni; aplike pwopozisyon ki pi laj nan peyi a pou elimine ko-peman pou ensilin nan kèk plan asirans; epi pwopoze lejislasyon pou konbat dèt medikal. Gouvènè Hochul te anonse pwopozisyon sa yo jis yon jou apre ogmantasyon salè minimòm New York la te antre an vigè.

"Premye eleman nan kad diskou sou Sitiyasyon Eta 2024 la se Pwogram Pwoteksyon Konsomatè ak Abòdabilite (Consumer Protection & Affordability Agenda) nou an – youn ki konbat efè maladi, andikap, pratik biznis enjis ak salè ki ba", **Gouvènè Hochul te deklare.** "Si de ane ki sot pase yo te gen pou wè ak mete plis lajan nan pòch Nouyòkè yo, ane sa a gen pou wè ak kenbe li la epi sa kòmanse ak pwoteje lajan kach moun yo genyen anba redi."

Pwokirè Jeneral Eta New York la, Letitia James, te deklare, "Soti nan atake konpayi ki responsab kriz opyoyid yo rive nan mete fen nan ogmantasyon pri, kolektè dèt predatè ak lòt pratik biznis twonpè, nou te atake yon bann konpayi paske yo te lakoz domaj kont Nouyòkè yo. Pandan ke nou te sispan aktè ki pi flagran yo, nouvo pwojè lwa sa a pral elaji ak ranfòse kapasite nou pou sispan pratik biznis enjis ak abizif ki fè twòp moun mal. Mwen vle remèsy Gouvènè Hochul, Senatè Eta Comrie, ak Manm Asanble Weinstein dèsk yo travay sere ak biwo mwen an pou fè pwoteksyon sa yo vin yon priyore."

Ranfòse Pwoteksyon Konsomatè yo

Gouvènè Hochul te pwopoze aksyon pou ranfòse pwoteksyon konsomatè yo atravè Eta New York atravè ekspansyon ki pi enpòtan nan lwa konsomatè a depi 1980. Pandan ke lwa aktyèl la pwoteje Nouyòkè yo kont pratik biznis twonpè yo, New York se youn nan sèlman uit eta nan nasyon an ke lwa pa pwoteje kont pratik biznis enjis ak abizif yo. Amannman pou elaji lwa pwoteksyon konsomatè yo pral transfòme fason New York pwoteje konsomatè yo, amelyore kapasite Pwokirè Jeneral la pou fè respekte pwoteksyon konsomatè yo, epi bay Eta a zouti adisyonèl pou pouswiv move aktè yo.

Gouvènè Hochul pral pwopoze tou lejislasyon pou mande founisè Buy Now Pay Later yo pou yo jwenn yon lisans pou opere nan eta a, epi pou otorize Depatman Sèvis Finansye (Department of Financial Services, DFS) Eta New York la pou pwopoze ak bay règleman pou endistri sa a k ap grandi rapidman. Nouyòkè yo deplizanpli tounnen vè prè Achte Kounye a Peye Pita kòm yon altènativ rantab pou pwodwi kredi tradisyonèl yo pou peye pou acha chak jou ak acha enpòtan yo. Lejislasyon ak règleman sa yo pral etabli gwo pwoteksyon endistri konsènan kondisyon divilgasyon, rezolisyon diskisyon ak estanda rapò kredi, limit frè an reta, enfòmasyon konfidansyèl konsomatè yo, ak direktiv pou anpeche modèl sonb ak akimilasyon dèt ak ekstansyon ki twòp.

Elaji Avantaj pou Konje Medikal ak Andikap Peye

Gouvènè Hochul te anonse yon plan pou ogmante avantaj maksimòm pou konje medikal ak andikap peye pou premye fwa nan 35 ane. Dapre plan an, Gouvènè a pral pwopoze yon amannman nan lwa andikap la pou ogmante benefis maksimòm chak semèn nan senk ane k ap vini yo epi lye li ak Salè Mwayèn Chak Semèn nan Tout Eta a (Statewide Average Weekly Wage, SAWW). Pou koresponn ak avantaj konje fanmi peye a, pou premye 12 semèn konje medikal yo, anplwaye ki kalifye yo ta resevwa 67 poustan nan salè mwayèn chak semèn yo, jiska 67 poustan nan SAWW la, yon fwa yo konplètman aplike li yon fason pwogresiv apre senk ane.

Maksimòm avantaj peye ki disponib pou Nouyòkè ki bezwen konje nan travay pou abòde pwòp bezwen sante yo, ki gen ladan nenpòt kondisyon ki gen rapò ak gwosès la, limite jiska 170 dola/semèn depi 1989. Ranfòse konje medikal ap non sèlman sipòte fanm ak paran yo, men tou, prèske 1 Nouyòkè sou 5 ki gen yon andikap, ki souvan bezwen konje travay pou jere bezwen sante ki gen rapò ak andikap yo.

Elimine Ko-Peman pou Ensilin

Gouvènè Hochul te anonse yon pwopozisyon pou elimine totalman pataj pri ensilin atravè lejislasyon pwopoze. Pwopozisyon sa a pral adopte entèdiksyon ki pi vast kont pataj pri ensilin nan peyi a, bay Nouyòkè soulajman finansye epi amelyore aderans ak medikaman sa yo ki kapab sove lavi. Ak 1.58 milyon Nouyòkè yo te dyagnostike ak dyabèt, pwopozisyon an prevwa ekonomize Nouyòkè yo yon sòm estimatif 14 milyon dola an 2025 sèlman.

Dapre Asosyasyon Dyabèt Ameriken (American Diabetes Association) an, moun ki gen dyabèt gen depans medikal ki 2.3 fwa pi wo pase moun ki pa gen dyabèt epi enpak la pi gwo menm pou kominote koulè yo, ki fè fas ak to dyagnostik ki wo yon fason ki pa pwopòsyonèl.

Konbat Dèt Medikal

Gouvènè Hochul pral prezante tou lejislasyon pou mete ajou ak elaji lwa sou asistans finansye lopital New York la pou pi byen pwoteje Nouyòkè yo kont dèt medikal.

Lejislasyon sa a ta gen ladann aksyon solid pou pwoteje Nouyòkè ki gen ti revni yo kont pwosè pou dèt medikal lè li limite kapasite lopital yo pou pouswiv devan lajistis pasyan k ap touche mwens pase 400 poustan Nivo Povrete Federal (120,000 dola pou yon fanmi ki gen kat moun). Lejislasyon an ta elaji pwogram asistans finansyè lopital yo pou Nouyòkè ki gen revni fèb yo, limite kantite peman mansyèl yo ak enterè yo peye pou dèt medikal yo epi aplike lòt pwoteksyon pou amelyore aksè ak asistans finansyè epi bese efè negatif dèt medikal yo sou Nouyòkè yo.

Plis Pase 700,000 Moun New York gen dèt medikal an rekouvreman. Moun ki gen dèt medikal yo gen mwens chans pou yo chèche swen medikal ki nesesè yo epi yo rapòte ke yo oblige koupe sou detèminan sosyal sante esansyèl yo, tankou manje, chofaj, ak lwave. Kòm rezulta, nivo dèt konsiderab menase non sèlman estabilite finansye anpil moun ak fanmi, men tou sabote angajman Eta a pou amelyore ekite sante ak rezulta sante yo.

Komisè Depatman Sante Eta New York Ia, Doktè James McDonald, te deklare, "Aksyon Gouvènè Hochul pral pwoteje Nouyòkè ki gen ti revni yo kont pwosè pou dèt medikal epi pran mezi ki nesesè pou elaji pwogram asistans finansye nan lopital yo. Lejislasyon sa a adrese konsekans dèt medikal yo te genyen sou byennèt finansye moun yo epi li se yon etap enpòtan pou pwoteje tout Nouyòkè kont dèt medikal."

Sirentandan Depatman Sèvis Finansye Eta New York Ia, Adrienne A. Harris, te deklare, "Twòp Nouyòkè jodi a dwe mete finans yo aleprèv pou yo peye swen sante enpòtan, tankou ensilin, ak pou peye depans chak jou, tankou lwave. Lè yon moun oblige chwazi ant yo de a, depriyorize sante yo afekte lavi yo, fanmi yo, epi finalman ogmante depans atravè sistèm swen sante a. Altènatif la pa pi bon. San ase lajan kach pou kouvri tout depans yo, Nouyòkè yo te tounen nan pwodwi Achte Kounye a Peye Pita yo, akimile dèt kay konpayi ki te opere san pwoteksyon nan eta sa a andan twò lontan. Kit se pou m regle depans pou medikaman enpòtan tankou ensilin, oswa pou etabli pwoteksyon konsomatè pou pwodwi Achte Kounye a Peye Pita yo, mwen pran

angajman pou m asire ke sistèm finansye nou an ap fonksyone pou tout Nouyòkè yo, pa kont yo."

Prezidan Komisyon Dedomajman Travayè Eta Neew York Ia, Clarissa M.

Rodriguez, te deklare, "Ogmante avantaj pou andikap pou rive nan 67 poustan peman jiska yon limit, ki reflete Konje pou Fanmi Peye Eta New York yo, sa vle di Nouyòkè yo pral gen menm sekirite finansye, kit y ap pran swen yon manm fanmi oswa pwòp bezwen sante pa yo. Mwen felisite Gouvènè Hochul paske li te pran aksyon solid pou asire ke travayè yo gen yon revni enpòtan lè yo bezwen pran swen tèt yo oswa moun yo renmen yo."

Direktè AARP Eta New York, Beth Finkel, te deklare, "Gouvènè Hochul yon lòt fwa ankò ap trase chemen nan pwoteje konsomatè New York yo kont pratik biznis enjis ak pwoteje kèk nan rezidan ki pi vilherab nou yo kont aksyon san eskripil ki kapab lakòz yon dezas finansye pèsònèl devastè. AARP New York dènyèman te bat bravo pou Gouvènè a lè li te siyen lwa ki asire dèt medikal pa parèt nan rapò kredi yon pasyan. Nou te fè sa ankò lè li te adopte yon pwojè lwa ki te vize pou rann ogmantasyon pri medikaman sou preskripsyon yo pi transparan, yon etap enpòtan nan abòde pri medikaman ki tou ap ogmante ke anpil Nouyòkè depann sou yo. Nouyòkè ki pi aje yo an patikilye pral benefisyé nouvo lwa sa yo. Nou ankouraje pa plan Gouvènè a pou elaji pwoteksyon konsomatè yo ak pwoteksyon kont dèt medikal pou Nouyòkè ki gen revni ba yo. Nou pa ka tann pou nou travay avèk Gouvènè a pandan l ap lanse dènye efò li pou bay tout Nouyòkè plis pwoteksyon konsomatè kont pratik ki twonpè ak abizif yo."

Direktris Kontansye pou Jistis Ekonomik nan Mobilization for Justice (Mobilizasyon pou Jistis), Carolyn Coffey, te deklare, "Move aktè yo eksplwate feblès nan lwa pwoteksyon konsomatè New York ki egziste a epi regilyèman yo pran avantaj sou konsomatè vilnerab yo ak ti biznis yo. Lwa ki gen plizyè deseni yo bezwen mizajou serye pou ranpli fonksyon li prevwa epi pou kenbe rit ak konduit nefas ak evolitif sou mache a. Li lè li tan pou Eta a ratrape plis pase 40 lòt jiridiksyon nan sans sa a epi tabli pi gwo estanda posib pou tout aktivite ekonomik nan Eta epi asire pwoteksyon enpòtan pou Nouyòkè yo, espesyalman pou moun ki nan kominote majinalize yo. Nou bat bravo pou angajman Gouvènè Hochul pou l pran mezi enpòtan sa a pou pwoteje kay ak ti biznis New York yo."

Agenda Pwoteksyon Konsomatè & Abòdabilite a

Proteksyon konsomatè Gouvènè Hochul ak ajanda abòdabilite a baze sou efò administrasyon li a ap fè pou kenbe lajan nouyòkè yo te fè anba redi nan pòch pa yo. Gouvènè a te siyen lejislasyon ane pase pou pwoteje Nouyòkè yo kont ogmantasyon pri ak dèt medikal. An 2022, Gouvènè a te siyen tou lejislasyon pou entèdi frè kache pou konsomatè ki achte tikè pou evènman an dirèk, elaji penalite pou itilizasyon wobo skalpè ak lojisyèl acha tikè, entèdi vant tikè gratis, epi entèdi frè livrezon sou tikè ki distribiye elektwonikman oswa ki enprime adomisil.

Pwopozisyon sa yo tou bati sou angajman Gouvènè Hochul pran pou fè eta a vin pi abòdab ak pi vivab pou tout Nouyòkè yo. Nan kad Bidjè Ane Fiskal 2024 la, Gouvènè a

te sekirize yon ogmantasyon istorik pou salè minimòm New York la ki pral ogmante salè minimòm nan jiska 2027 apre sa revize li pa rapò ak enflasyon an. Gouvènè Hochul te avanse tou Aksyon Egzekitif pou adrese kriz lojman New York la epi redwi depans lojman nan ogmante rezèv lojman eta a.

###

Lòt nouvèl disponib sou sit www.governor.ny.gov

Eta New York | Chanm Egzekitif | press.office@exec.ny.gov | 518.474.8418
Enskri pou w jwenn mizajou Biwo Gouvènè a: ny.gov/signup | Voye tèks NEW YORK bay 81336

[ANILE ENSKRIPSYON OU](#)